



Број/Број:03/1-50-14-7-19/13
Сарајево/Sarajevo, 24. 1. 2013.

PREDMET: Izvještaj s održane Radionice o temi: „Odbrambeno-sigurnosni sektor u Bosni i Hercegovini – godinu dana poslije” s prijedlogom zaključaka

U skladu s Orijentacionim planom rada za 2012. godinu, u organizaciji Zajedničke komisije za odbranu i sigurnost BiH (u daljnjem tekstu: Zajednička komisija), u Tesliću je 5. i 6. novembra 2012. održana radionica o temi: „**Odbrambeno-sigurnosni sektor u Bosni i Hercegovini – godinu dana poslije**”. Podršku u organizaciji radionice dali su Štab NATO-a u Sarajevu i Misija OSCE-a u BiH.

U ime Zajedničke komisije i Parlamentarne skupštine BiH (u daljnjem tekstu: PSBiH), u radu radionice učestvovali su: Dušanka Majkić, predsjedavajuća Zajedničke komisije, Staša Košarac, Borislav Bojić, Nermina Zaimović - Uzunović, Krunoslav Vrdoljak, Beriz Belkić i Mehmed Bradarić, članovi Zajedničke komisije, Boško Šiljegović, parlamentarni vojni povjerenik, Željko Grubešić, stručni savjetnik, i Jovica Katić, stručni saradnik u Zajedničkoj komisiji.

U radu radionice učestvovali su predstavnici:

1. SEKTORA ODBRANE, i to:

- Ministarstva odbrane BiH:

- Mirko Okolić, v. d. ministra odbrane BiH,
- Marina Pendeš, zamjenica ministra odbrane BiH,
- Muhamed Smajić, sekretar Ministarstva odbrane BiH,
- Sead Muratović, Miroslav Cabo i Blažen Kovač, pomoćnici ministra odbrane BiH,
- Brigadni general Husein Tursunović, generalni inspektor.

- Zajedničkog štaba Oružanih snaga BiH:

- general-pukovnik Miladin Miložić, načelnik

- Operativne komande Oružanih snaga BiH: brigadni general Ivica Jerkić, komandant.

2. SEKTORA SIGURNOSTI, i to:

- **Ministarstva sigurnosti BiH:**
 - o Murveta Džaferović, Vjekoslav Vuković, Radenko Stanić i Samir Agić, pomoćnici ministra sigurnosti BiH
- **Državne agencije za istrage i zaštitu – SIPA-e:**
 - o Goran Zubac, direktor
- **Granične policije BiH:**
 - o Vinko Dumančić, direktor
- **Službe za poslove sa strancima:**
 - o Rade Kovač, pomoćnik direktora
- **Direkcije za koordinaciju policijskih tijela BiH:**
 - o Himzo Selimović, direktor
- **Agencije za policijsku podršku:**
 - o Rahmija Hodžić, direktor
- **Agencije za forenzička ispitivanja i vještačenja:**
 - o Ljiljana Trišić, direktorica
- **Agencije za školovanje i stručno usavršavanje:**
 - o Branko Vukoja, direktor

3. DRUGIH INSTITUCIJA nad kojima Zajednička komisija u dijelu svojih nadležnosti provodi parlamentarni nadzor, i to:

- **Ministarstva vanjske trgovine i ekonomskih odnosa BiH:**
 - o Velibor Lučić, šef odsjeka
- **Centra za deminiranje – BHMAL-a:**
 - o Dušan Gavran, direktor.

4. ENTITETSKIH ZAKONODAVNIH I IZVRŠNIH ORGANA koji se bave pitanjem sigurnosti, i to:

- **Odbora za sigurnost Parlamenta Federacije BiH:**
 - o Ivica Jurčić, predsjednik

- **Vlade Republike Srpske:**
 - o Duško Četković i Rajko Čkonjević.

5. MEĐUNARODNIH ORGANIZACIJA U BiH, i to:

- **Misije OSCE - a u BiH:**
 - o Nina Suomalainen, zamjenica šefa Misije OSCE-a u BiH
 - o Harald Quiel, direktor Odjela za sigurnosnu saradnju
 - o Jasna Dragičević, Vera Orloff, Odjel za sigurnosnu saradnju
- **Štaba NATO-a u Sarajevu:**
 - o Harald Hiort, zamjenik komandanta
 - o Lejla Hadžihasanović, oficir za vezu s parlamentima
- **Komande EUFOR-a:**
 - o Igor Dimitrovski – pravni sektor
- **Ambasade SAD-a u BiH:**
 - o Brigadir Scott Miller, vojni ataše SAD-a u BiH
 - o Kevin Murphy
 - o Anna Radivilova
 - o Amel Fako
- **ICITAP-a:**
 - o Jim Tillman, direktor
- **EUSR-a:**
 - o Stephen Goddard i Ramiz Huremagić, Odjel za unutrašnju politiku i javnu sigurnost
- **USAID-ovog Programa za jačanje parlamenata:**
 - o Christian Haupt, direktor programa

6. NEVLADINOG SEKTORA, i to:

- **Centra za sigurnosne studije:**
 - o Denis Hadžović, generalni sekretar.

Nakon uvodnih izlaganja Dušanke Majkić koja je naglasila ciljeve održavanja radionice, učesnicima radionice obratili su se Nina Suomalainen, zamjenica šefa Misije OSCE-a u BiH, i Harald Hiort, zamjenik komandanta Štaba NATO-a u BiH.

Rad se odvijao prema utvrđenom programu, a izlaganja svih učesnika sadržana su u neautoriziranom transkriptu Radionice, koji čini sastavni dio ovog izvještaja.

I. ANALIZA STANJA PO INSTITUCIJAMA

Jačanje transparentnosti, odgovornosti, izgradnja integriteta institucija odbrane i sigurnosti nastavljani su i na ovoj radionici koja je po drugi put održana u Tesliću. Ako se na tom planu ne učini napredak i poboljšanje, doći će u opasnost integritet institucija, posebno u sektoru odbrane. Složenost problematike odbrambenog sektora govori o neizgrađenim institucijama koje prijete potpunim urušavanjem. Jer, tamo gdje su uspostavljena efikasna pravila i procedure, tamo gdje je jasno definirano ko šta radi i kako se to radi, nema ovakve vrste problema. Zajednička komisija posebno izražava žaljenje što u domenu odbrane nije napravljen ozbiljniji iskorak u odnosu na prethodnu radionicu iz 2011.godine, iako je bila jako involvirana u te procese. Mnogo vremena provedeno je na parlamentarnom nadzoru odbrambeno-sigurnosnog sektora. Nažalost, još uvijek ni Ministarstvo odbrane BiH, ni Oružane snage BiH ne doživljavaju Zajedničku komisiju kao partnera na istom zadatku.

• **MINISTARSTVO ODBRANE I ZAJEDNIČKI ŠTAB ORUŽANIH SNAGA BiH**

Zajednička komisija bila je nosilac velikog broja inicijativa i aktivnosti koje su bile usmjerene na sljedeće: **nadzor nad poštovanjem zakonitosti rada Ministarstva odbrane BiH (u daljnjem tekstu: MOBiH) i Oružanih snaga BiH (u daljnjem tekstu: OSBiH), nadzor nad upotrebom javnih sredstava od strane MOBiH i nadzor nad provođenjem utvrđenih pravila i procedura od strane zaposlenih u MOBiH i OSBiH.**

Uočeno je da su ključni problemi MOBiH: **logistika, finansije i personal.** U skladu s tim, očekivalo se da će u tim sektorima biti preduzete i najveće aktivnosti na promjeni stanja.

MOBiH i Zajednički štab OSBiH (u daljnjem tekstu: ZŠOSBiH) su sredinom marta 2012. godine, nakon ponovne inicijative i preporuke Zajedničke komisije, dostavili podatke o trenutnom stanju i izvršenju obaveza po sektorima, problemima koje treba rješavati, te rokovima izvršenja obaveza kroz definirani Akcioni program u kojem su određeni nosioci, rokovi i odgovorna lica. Međutim, i dalje je evidentno da se stvari u sektoru odbrane sporo kreću naprijed.

Razmatrana je sljedeća problematika MOBiH:

1.1 Status i stanje materijalno – finansijskog računovodstva u OSBiH

Materijalno-finansijsko računovodstvo u MOBiH još uvijek nije formirano. I dalje postoji **pet nezavisnih knjigovodstava**, i to:

- Knjigovodstvo MO za perspektivnu imovinu MOBiH,
- Privremeni knjigovodstveni centar (PKC) OSBiH za perspektivnu imovinu,
- PKC Rajlovac za neperspektivnu (bošnjačku) imovinu bivše Vojske Federacije,
- PKC Mostar za neperspektivnu (hrvatsku) imovinu bivše Vojske Federacije i
- PKC B.Luka za neperspektivnu imovinu bivše VRS.

Odlukom MOBiH krajem 2012.godine, u formacijskoj strukturi ZŠOSBiH dodato je, ugrađeno i osnovano novo **Odjeljenje za materijalno poslovanje** koje ima krajnje upitnu računovodstvenu ulogu da (u još upitnijem isključivo **naturalnom nevrjednosnom** izrazu) obuhvati **samo** pokretnu imovinu koja se pribavlja, troši ili je već na zalihama i u upotrebi isključivo u OSBiH, što je suprotno usvojenom zakonskom budžetskom institucionalnom okviru.

Zakonom propisani **budžetski institucionalni okvir BiH** poznaje samo MOBiH, kao jedan i jedinstven entitet javnog sektora, i od njega očekuje jedan, jedinstven i homogen računovodstveni budžetski **vrjednosni** obuhvat povjerene mu imovine. Dakle, ova odluka i iz nje proizašlo rješenje u vidu nekog odjeljenja izvan MOBiH i njegovih računovodstvenih bilansnih izvještaja nije na liniji nalaza i preporuka Ureda za reviziju institucija BiH iz prethodne i prethodnih budžetskih godina.

Posebno je nejasno na bazi kojih su nalaza i preporuka Ureda za reviziju institucija BiH u MOBiH i ZŠOSBiH došli do zaključka da organizacionim preformiranjima (formiranjem novog odjeljenja i to u ZŠ) mogu otkloniti jasne i nedvosmislene nezakonitosti, tj. fundamentalno i suštinsko nedostajanje jasnih i nedvosmislenih računovodstvenih politika u MOBiH o računovodstvenom evidentiranju imovine i finansijskom i računovodstvenom izvještavanju i upravljanju imovinom u MOBiH.

Manjkavost ovako formiranog i organiziranog računovodstva produbljuje se i činjenicom da ovo odjeljenje u svoje naturalne knjige za dvije godine postojanja nije evidentiralo svu perspektivnu i potrebnu imovinu MOBiH određenu Odlukom Predsjedništva BiH i Rješenjem ministra odbrane BiH iz 2010.godine, jer logistički menadžment OSBiH ne pokreće radnje za dovršetak ovih aktivnosti, tako da brojka od oko 72000 stavki još uvijek nije ni fizički a ni računovodstveno dostignuta.

Posebno je problematično odstupanje i neusklađenost odnosno neuparenost, količina računovodstvenog obuhvata municije i MES-a do količine od 6 b/k (šest borbenih kompleta) s količinama iz Odluke Predsjedništva BiH i Rješenja ministra odbrane BiH o viškovima naoružanja, municije i MES-a iz 2009.godine, gdje će količine u računovodstvu i skladištima

korespondirati, tj. biti usklađene s Odlukom Predsjedništva BiH i Rješenjem ministra odbrane BiH za samo jednu jedinu stavku, odnosno sredstvo.

Istovremeno, u računovodstvenim izvještajima ovog odjeljenja nastavlja se računovodstveno evidentirati imovina koja nije u Odluci Predsjedništva BiH i u Rješenju ministra odbrane BiH.

Na ovako neokončan proces i na ovako nejasnu formacijsku popunu i računovodstvenu neobuhvaćenost nadovezana je i Odluka ministra odbrane BiH iz maja 2012.godine kojom je dozvoljena aktivnost rashodovanja pokretne imovine što je nedopustivo ako se ima u vidu da se želi rashodovati imovina koja se nalazi na spisku –pregledu koji nominalno nosi naziv „Lista-pregled ostale pokretne vojne imovine koja će i dalje služiti za potrebe MOBiH“ („Sl. glasnik BiH“, broj 36/2010).

Ove odluke i ovakva rješenja potvrđuju kontinuitet tvrdoglavog odbijanja percipiranja činjenice da OSBiH nisu i ni u budućnosti ne mogu biti izvan ni iznad zakonodavnopravnih rješenja u BiH, te da za ovako ustrojena računovodstvena rješenja moraju imati posebne odluke zakonodavnih organa i tijela BiH.

Ured za reviziju institucija BiH navodi da računovodstveni sistem MOBiH nije u stanju da osigura kvalitetne i pravovremene informacije, jer MOBiH nije uspostavilo sistem blagovremenog dostavljanja finansijske dokumentacije, iako su u sistem elektronske fluktuacije pošte (pa i finansijske dokumentacije) i informacija uložena značajna budžetska sredstva MOBiH po prethodno potpisanim a očito nerealiziranim ugovorima.

Ništa nije urađeno na unapređenju obračuna plaća. Dok se isplata plaća za zaposlene u MOBiH vrši posredstvom Ministarstva finansija i trezora BiH i centraliziranog sistema za obračun plaća, kao za sve institucije BiH, dotle se obračun plaća za pripadnike OSBiH vrši u MOBiH putem improviziranog kompjuterskog sistema.

Sistem obračuna plaća je trom i neeleastičan i izaziva ogromno nezadovoljstvo pripadnika OSBiH, posebno u kontekstu brzine otklanjanja grešaka u obračunu gdje se na korekture plaća i retroaktivne isplate čeka i do dva mjeseca, a cijeli obračun je sublimiran u prisustvo jednog čovjeka bez koga su obrada plaća i obračun nemogući što je nedopustivo za ovako razrađen sistem.

Na ime zakupa stanova u 2011. godini MOBiH potrošilo je 7,6 miliona maraka, 2.983 aktivna ugovora o zakupu stambenog prostora od čega vojnici 944, podoficiri 1.178, oficiri 848. Treba razmotriti mogućnost da se adaptacijom kasarni dođe do jeftinijeg smještaja za pripadnike OSBiH.

- **Popis MiMES-a u skladištima**

Perspektivna ali i neperspektivna imovina OSBiH, koja obuhvata oružje, municiju i minsko-eksplozivna (MiMES) sredstva, nikada nije popisana. Šest godina od početka reforme

odbrane u BiH i dalje nije poznato stvarno stanje MiMES-a u skladištima. Procjenjuje se da ukupna količina viškova MiMES-a iznosi oko 20.000 t, ali nijednim relevantnim dokumentom to ne može biti potvrđeno. Također, na bazi procjene, utvrđena je i količina perspektivnog MiMES-a koja iznosi oko 12.556 t (bruto), odnosno oko 10.000 t (neto).

Perspektivni MiMES još uvijek nije razdvojen po materijalnoj formaciji - 6b/k, ali ključni problem leži u tome što se u skladištima i dalje nalazi perspektivni i neperspektivni MiMES zajedno. Pregled skladišta-lokacija je sljedeći:

a) Perspektivna skladišta MiMES-a su:

1. Gabela - Čapljina
2. Krupa- Hadžići
3. Grabež- Bihać
4. Kula I i Kula II – Mrkonjić Grad
5. Kozlovac- Tuzla

b) Neperspektivna skladišta MiMES-a su:

1. Kosova – Goražde
2. Ljuta – Konjic
3. Bačevići – Mostar
4. Jahorinski potok – Pale
5. Uzamnica - Višegrad
6. Car Dušan – Rudo
7. Duži – Trebinje
8. Daljani – Donji Vakuf
9. Draga – Busovača
10. Krčmarice – Banja Luka
11. Bukova Greda - Orašje
12. Blažuj -Sarajevo

c) RzOU MiMES – privremena skladišta MiMES-a koja čekaju uništavanje:

1. Gladna brda – Glamoč (uništavanje eksplozijom)
2. RzOU MiMES/ GloB - Doboj (uništavanje delaboracijom)

MOBiH uporno odbija izvršiti popis MiMES-a u skladištima i pored toga što je utvrđeno ozbiljno stanje prilikom vanrednog popisa u tri skladišta, i to: **Gabela-Čapljina** (perspektivno), **Duži-Trebinje** (neperspektivno) i **Daljani-Donji Vakuf** (neperspektivno). I pored značajnih odstupanja (manjkovi-viškovi) u tim skladištima, MOBiH i ZŠOSBiH nisu ništa preduzeli da se ovo stanje razriješi i krivci sankcioniraju.

Dakle, od **ukupno 20 skladišta MiMES-a, popis je izvršen samo u tri**. Treba uraditi sve da se izvrši vanredni popis svih skladišta. Tek tada će se dobiti podaci o pravim razmjerama zloupotreba u raspolaganju MiMES-om u OSBiH.

Također, nadležne strukture nisu obavile kvalitetetnu raspravu o rezultatima vanrednog popisa u tri navedena skladišta-lokacije s upravno-pravnog i računovodstvenog stanovišta. Nije izvršena izrada upravno-pravne i materijalne dokumentacije koja bi omogućila zakonom propisano **svodenje knjigovodstvenog stanja na stvarno utvrđeno stanje u knjigama i skladišnim evidencijama, te raspravljanje i utvrđivanje odgovornosti, kao i evidentiranje postupaka utvrđenih manjaka i višaka u odgovarajuće knjige manjaka i glavne knjige.**

Istražna komisija Parlamentarne skupštine BiH je u julu 2012. godine završila rad na provođenju istrage zakonitosti procesa uništavanja MiMES-a za period 2006.-2010. godina. Izvještaj je usvojen u oba doma Parlamentarne skupštine BiH. Na zahtjev glavnog tužioca BiH, svi materijali predati su Tužilaštvu BiH. SIPA i Tužilaštvo BiH rade na većem broju slučajeva iz ove oblasti.

- **Ponovna analiza perspektivne vojne imovine i rješavanje višaka**

Spisak pokretne, perspektivne imovine koja će u skladu sa Sporazumom i dalje služiti za potrebe odbrane **nije prikazan vrijednosno u poslovnim knjigama**, niti razdvojen u skladu s međunarodnim računovodstvenim standardima, onako kako se to predviđa za nekretnine, postrojenja i opremu. I dalje ne postoji jasan plan za prevazilaženje ovog problema. Neophodno je izvršiti ponovnu analizu i **osloboditi perspektivnu vojnu imovinu stavki koje su nepotrebne OSBiH** (nisu po materijalnoj formaciji). **Time se rješavaju dva cilja: oslobađanje višaka s neperspektivnih lokacija i usaglašavanje perspektivne vojne imovine s formacijom.**

Primjer: Motorna vozila koja nisu u funkciji, pokretna imovina za stacionarne vojne ambulante ili vojne bolnice, kojih nema u formaciji OSBiH (mirnodopskoj ni ratnoj), (hirurška, oftalmološka, stomatološka, itd.), a koje nisu predviđene formacijom, i dalje su na spisku perspektivne imovine. Stacionarni kapaciteti, sredstva i alati za srednji, viši i generalni remont (a formacijom nisu predviđena mjesta), odnosno čemu ova perspektivna pokretna imovina kad postoje planirana budžetska sredstva za ove nivoe remonta izvan OSBiH ili izvan BiH.

Rješavanje viškova naoružanja je definirano Odlukom Predsjedništva BiH. Principi su **prodaja, donacije i uništavanje**. Posebna komisija MO, **Komisija za provođenje postupka rješavanja viškova pokretne imovine**, treba da predloži način rješavanja viškova. Komisija radi od 2009. godine sa izuzetno slabim rezultatima. Potrebno je izvijestiti Zajedničku komisiju o njenom dosadašnjem angažmanu (šta je do sada urađeno i zašto taj proces sporo teče). Također, potrebno je utvrditi s kojim polaznim materijalom perspektivnih i

neperspektivnih sredstava (oružja, municije i MES-a) polazi Komisija u toku svojih razmatranja i predlaganja rješenja.

Prema Izvještaju MOBiH iz 2012. godine, do sada je uništeno 646 tona municije, od čega su u kapacitetima OSBiH uništene 353 tone metodom delaboracije i spaljivanja. Na poligonu Glamoč uništene su 293 tone metodom detonacije na otvorenom, koje izvodi „Sterling International“, u skladu s tehničkim aranžmanom koji je potpisan sa Stejt departmentom.

U 2012. godini donirane su 24 haubice 122 mm afganistanskim snagama sigurnosti, shodno Odluci Predsjedništva BiH. Prodaja naoružanja u prethodnom periodu obuhvatila je realizaciju Ugovora o prodaji naoružanja koji su potpisala bivša entitetska ministarstva odbrane, a koji je realiziran do 15. 7. 2011., gdje su izvršene daljnje pripreme za nastavak realizacije, odnosno aneksiranje ugovora. Očekuje se potpisivanje aneksa u najskorije vrijeme.

- **Javne nabavke**

Javne nabavke se i dalje odvijaju netransparentno i mimo Zakona o javnim nabavkama BiH (vidjeti revizorski izvještaj). Tri godine zaredom revizija uočava nepoštivanje procedura javnih nabavki. Do sada nije ništa učinjeno da se stanje promijeni.

Vojnicima nedostaju hrana, obuća i odjeća. Vojni povjerenik je u nenajavljenoj posjeti nekim jedinicama utvrdio da organizacija ishrane teče otežano, te da pripadnici nekih jedinica ne ostvaruju pravo na topli obrok. Personal često od svojih sredstava kupuje prehrambene namirnice. Vojnici OSBiH otišli su u Afganistan u izvršenje misije bez odgovarajućih uniformi i obuće, koju tamo posuđuju od Danaca.

Revizorski izvještaji govore da se budžetska sredstva u MOBiH koriste na netransparentan i neefikasan način. Svake godine revizija daje sve veći broj preporuka, odnosno sve veći broj nalaza. U 2011. godini evidentirane su 42 preporuke revizora. Dakle, radi se o preporukama koje govore o tome šta treba nužno popraviti u MOBiH.

Deminerski bataljon, kao jedna od rijetkih svijetlih tačaka u MOBiH i OSBiH, ispunio je obaveze iz plana deminiranja sa svega 30% do 31. 10. 2012. Nedostaje oprema za deminiranje. Nabavljeni panciri i viziri su u skladištu, ali su lošeg kvaliteta i ne smiju se koristiti. Posebno zabrinjava izvršavanje ovih zadataka i pored informiranosti o nedostatku sanitetskih sredstava, odnosno insistiranje da se deminiranje sanitetski obezbjeđuje nekompletnim sanitetskim sredstvima i sanitetskim materijalom kojem je istekao rok.

- **Stanje personala u MOBiH i OSBiH**

Konstatirano je da je sve veći broj pripadnika OSBiH nezadovoljan stanjem u OSBiH. Ne mogu da napreduju u skladu s pravilnicima, da se školuju ili unapređuju po zakonima i pravilima službe.

U skladu s preporukama parlamentarnog vojnog povjerenika iz izvještaja o njegovom radu, Zajednička komisija za odbranu i sigurnost BiH nalaže Ministarstvu odbrane BiH da u što kraćem roku uradi sljedeće:

- donese Pravilnik o profesionalnom razvoju i upravljanju karijerom;
- donese pravilnik kojim će se urediti (vrednovati) nivoi civilnog i vojnog obrazovanja te stručno usavršavanje putem kurseva;
- donese propis kojim se regulira nošenje jedinstvene terenske uniforme, s tačno definiranim odredbama i trajnog roka važenja i primjene. Ovaj propis mora biti javno objavljen kako bi sva lica koja eventualno žele da pristupe Oružanim snagama BiH bila upoznata s pravima ali i obavezama prilikom nošenja uniforme;
- preduzme mjere da, u skladu s odredbama upravnog postupka, sve akte koji se tiču nastanka, promjene ili prestanka nekog pravnog odnosa, a koji se odnose na pojedina profesionalna vojna lica (PVL), Komandi za upravljanje personalom moraju dostavljati profesionalna vojna lica o čijim se pravima i obavezama radi, ili matične jedinice, u roku određenom upravnim postupkom;
- na oglasnim tablama objavi i preliminarne i konačne cjelokupne liste (na svim lokacijama Oružanih snaga BiH), na osnovu kojih će biti donesene naredbe o unapređenju/prekategorizaciji, kako bi transparentnost principa bila ispoštovana u svim fazama unapređenja/prekategorizacije (prema dosadašnjoj praksi objavljujane su preliminarne i konačne rang-liste, ali parcijalne, odnosno samo za određene lokacije);
- razvije jasnu koncepciju upravljanja karijerom profesionalnih vojnih lica, te u tom pravcu kreira i politiku selektivnog upućivanja najboljih kandidata na dodatne civilne, a prije svega vojne obuke i usavršavanja;
- da, zajedno sa Zajedničkim štabom Oružanih snaga BiH, istraje u poštivanju odredbe člana 147. stav (2) Zakona o službi u Oružanim snagama BiH, kojim je ograničeno trajanje privremenog upućivanja profesionalnog vojnog lica u neku drugu komandu, jedinicu, ustanovu Oružanih snaga BiH i Ministarstvo odbrane BiH u istom ili drugom mjestu službe, na period koji ne smije biti duži od jedne godine za vrijeme trajanja jednog ugovora;
- skrene pažnju nadležnim komandama na proceduralne propuste u smislu vođenja upravnog postupka prilikom određivanja lica za vršioca dužnosti, uvede obavezu postavljanja formacijskog zamjenika za vršioca dužnosti, kao i da obezbijedi da

se ovaj institut (postavljanja lica za vršioca dužnosti) ne zloupotrebljava kako na jedno radno mjesto ne bi bilo postavljano više lica;

- postupak ocjenjivanja pripadnika Oružanih snaga BiH provodi i okončava u tačno utvrđenim periodima za ocjenjivanje, u skladu s članom 31. Pravilnika o ocjenjivanju rada profesionalnih vojnih lica (broj: 10-02-3-5624/10, od 17. 12. 2010.), a Komanda za upravljanje personalom treba da uloži dodatni napor kako bi sve faze ocjenjivanja bile upotpunjene (od početnog razgovora do praćenja realizacije postavljenih ciljeva i zadataka);
- pooštri kriterije za ocjenjivanje ili utvrdi tačan broj profesionalnih vojnih lica koja mogu biti ocijenjena ocjenom odličan, a s ciljem zadovoljavanja realnih kadrovskih potreba Oružanih snaga BiH, na pravičan način;
- analizira troškove zakupa za privremeni smještaj vojnika, podoficira i oficira, sa aspekta smanjenja troškova i mogućnosti eventualnog rješavanja pitanja privremenog smještaja unutar kasarni, gdje god je to moguće.

Pitanje naknade „**letački dodatak**“ za pilote koji nisu prošli preobuku za helikoptere ali i pilote koji uopće ne lete nego se nalaze na različitim pozicijama u i van MOBiH i OSBiH – još uvijek nije riješeno iako ga je u nekoliko navrata problematizirala Zajednička komisija.

MOBiH i ZŠOSBiH nisu u dosadašnjem periodu informirali Zajedničku komisiju povodom afera koje su često predmet medijskih natpisa. Skriva se istina od Zajedničke komisije. Kažnjavaju se pripadnici OSBiH koji se usude da o problemima u MOBiH i OSBiH upoznaju Zajedničku komisiju (nezavršen slučaj remonta helikoptera u Ukrajini i sl., pad helikoptera itd.).

- **Stanje ljudskih prava u OSBiH**

Parlamentarni vojni povjerenik dao je kompletnu informaciju i presjek stanja u vezi sa zaštitom ljudskih prava vojnih lica i kadeta u MOBiH i OSBiH.

Naglasio je da je Zajednička komisija tokom rada s njim te kroz Izvještaj, odnosno analizu o stanju personala usvojila 12 zaključaka.

MOBiH bilo je dužno da donese pravilnik o profesionalnom razvoju i upravljanju karijerom, pravilnik kojim će se urediti i vrednovati nivoi civilnog i vojnog obrazovanja, te stručno usavršavanje putem kurseva, da donese propis kojim se regulira nošenje jedinstvene terenske uniforme i mnogo toga. U 2011. godini bilo je 116 pritužbi upućenih parlamentarnom vojnom povjereniku. Riješeno je 79, a 37 je bilo u radu. Riješenost pritužbi je 81%. Do 1.10.2012. parlamentarni vojni povjerenik je zaprimio 68 pritužbi. Ono što je bilo sadržano u

analizi stanja personala pojavljuje se sve vrijeme i kroz aktivnosti parlamentarnog vojnog povjerenika. Evidentirane su uobičajne pritužbe. To su pitanja unapređenja, naknada i drugo.

Evidentna je bila jedna novina u 2012. godini. To je bio problem jake, duge zime i problem grijanja. To je uslovalo problem nehumanog odnosa prema ljudima u kasarnama i jedinicama. Radili su, izvršavali svoje poslove i zadatke na –25 stepeni Celzija. Niko nije odgovarao zato što nije bilo grijanja. Bilo je i havarija na sistemima grijanja. Komandanti brigade su uredno i na vrijeme tražili potrebne energente.

Problemi sa ishranom u OSBiH traju skoro tri godine.

Istaknut je primjer da je zbog lošeg kvaliteta ishrane Jedinice za Misiju ISAF, koja je trajala pet mjeseci, u prosjeku svaki pojedinac smršao 7kg.

- **Remont helikoptera MI-8 i MI-17**

MOBiH je dostavilo Izvještaj o remontu helikoptera s pratećom dokumentacijom po zaključcima sa 6. sjednice Zajedničke komisije. U materijalu nedostaju zapisnici o prijemu helikoptera (koji su sačinjeni u Ukrajini) i zapisnici supervizora MOBiH, koji je obavio pregled helikoptera po povratku u BiH. Radi se o pokušaju očitog zataškavanju ovog slučaja.

- **Nabavka uniformi za pripadnike OSBiH**

Informacija o nabavci uniformi za pripadnike Oružanih snaga BiH je i dalje pod velom tajni, iako je poznato da je generalni inspektorat završio svoj dio istrage i sačinio izvještaj s kojim je upoznao bivšeg ministra.

MOBiH je pokrenulo inicijativu prema Tužilaštvu BiH, s ciljem utvrđivanja odgovornosti za realizaciju nabavki uniformi za pripadnike OSBiH, te formiralo posebnu Komisiju za kontrolu kvaliteta i daljnje provođenje realizacije ugovora.

Informacije govore da se Tužilaštvo BiH intenzivno bavi ovim slučajem.

- **Status dokumenta „Pregled odbrane“**

Pregled odbrane, koji MOBiH s partnerima radi više godina, još uvijek nije završen. Nema informacije šta se trenutno radi na ovom planu i kada ćemo konačno doći do ovog dokumenta.

- **Dinamika predaje viška lokacija civilnim vlastima**

Trenutno se u posjedu OSBiH nalazi 46 neperspektivnih lokacija, i to: 35 lokacija na prostoru FBiH i 11 lokacija na prostoru RS-a. Do povećanja broja lokacija došlo je na osnovu Odluke Predsjedništva BiH. Smanjen je broj perspektivnih lokacija sa 69 na 63. Od 46 neperspektivnih lokacija, 18 lokacija je odmah spremno za predaju civilnim strukturama, dok je preostalih 28 uslovljeno rješavanjem naoružanja, municije i minsko-eksplozivnih sredstava, te preuzimanjem ostale pokretne imovine od entitetskih vlada. U 2012. godini civilnim strukturama predate su dvije lokacije: lokacija u Mostaru i Kasarna Slimena u Travniku. U toku su pripreme i dogovori s entitetskim vladama za predaju lokacija Lanje-Tešanj, Kasarna Kaonik Busovača i Krajiških brigada- Zalužani. Potrebno je utvrditi dinamiku predaje ostalih lokacija.

- **Vanredni događaji**

Evidentna je sve češća pojava „vanrednih događaja“ u MOBiH i OSBiH koji za sobom povlače značajna finansijska sredstva i ruše kredibilitet MOBiH i OSBiH u javnosti. Potrebno je sačiniti izvještaj o svim slučajevima koji su registrirani u 2011. i 2012. godini.

- **Završna razmatranja**

Odbrambeni budžet smanjuje se zbog ekonomske krize u zemlji. To zahtijeva krajnje racionalan pristup i izuzetnu pažnju u planiranju i korištenju sredstava tekućeg budžeta. MOBiH mora izvršiti racionalizaciju i redukciju u svim segmentima svog poslovanja i pokušati da za vrijednost koju je dobilo iz budžeta BiH, a radi se o najvećem budžetskom korisniku, koji troši oko 300 miliona maraka godišnje, ostvari što veći broj postavljenih ciljeva i zadataka.

Mnogi su istakli da ne postoji izgrađen sistem efikasne kontrole, ali i da je, tamo gdje postoji, nedosljedan.

Proces uspostave unutrašnje kontrole u sektoru odbrane nije zadovoljavajući jer ne postoje neophodni i ažurirani pravilnici. Duga je lista nedostajućih uputstava i pravilnika. Parlamentarni vojni povjerenik je za sektor personala pobrojao ono što nedostaje ili ono što treba prilagoditi vremenu i stvarnosti.

• **MINISTARSTVO SIGURNOSTI BiH i SIGURNOSNE AGENCIJE**

Nekooperativnost Ministarstva sigurnosti BiH imala je direktne reperkusije na aktivnosti Zajedničke komisije. Međutim, dobra saradnja sa sigurnosnim agencijama bila je evidentna.

Od terorističkog napada na Ambasadu SAD-a u BiH trajala je stalna prepiska između Zajedničke komisije i Ministarstva sigurnosti BiH o brojnim sigurnosnim problemima. Zajednička komisija insistirala je i tražila, a Ministarstvo sigurnosti BiH je odugovlačilo, slalo nepotpune informacije, pa je čak slalo i potpuno neusaglašene informacije.

Pitanja na koje Zajednička komisija nije dobila odgovore su:

1. Koji su to ključni sigurnosni izazovi u BiH i okruženju?
2. Prijeti li nam ponovo uvođenje viza i šta radimo da se to ne dogodi?
3. Zašto Ministarstvo sigurnosti BiH umjesto Izvještaja o stanju sigurnosti za 2011. godinu Zajedničkoj komisiji dostavlja Informaciju o stanju kriminaliteta, iako je poznato da jedan izvještaj ne mogu zamijeniti drugi?
4. Dokle je došla realizacija Strategije i Akcionog plana za borbu protiv terorizma?
5. Dokle je došla realizacija Strategije i Akcionog plana za borbu protiv organiziranog kriminala?
6. Šta se preduzima da bi se osujetio eventualno novi napad na strane ambasade?
7. Kada će biti urađena nova Sigurnosna politika BiH?

2.1.GRANIČNA POLICIJA BiH

Granična policija stasala je u vrlo ozbiljnu policijsku agenciju, koja je preuzete obaveze u proteklih godinu dana uspješno realizirala. Izvršavanje svakodnevnih zadataka opterećeno je višemjesečnim štrajkom koji može posredno i neposredno uticati na sigurnost bh. granica. Pravilnik o unutrašnjoj organizaciji još uvijek nije dobio saglasnost Vijeća ministara BiH što ugrožava rad Granične policije. Aktuelizirano je pitanje izrade graničnih prijelaza koji postaju veoma značajni s obzirom na skori ulazak Hrvatske u EU.

2.2.DRŽAVNA AGENCIJA ZA ISTRAGE I ZAŠTITU - SIPA

U posljednje vrijeme SIPA je uradila nekoliko konkretnih akcija koje su bile usmjerene na rješavanje pitanja organiziranog kriminala. Javnost je upućena u tok operacije i način na koji je SIPA to uradila.

Prioritet rada SIPA-e je borba protiv terorizma, organiziranog kriminala, korupcije, rješavanje teških slučajeva finansijskog kriminala, pranja novca, itd.

Usvajanje Prijedloga izmjena i dopuna Zakona o policijskim službenicima, te Zakona za sprečavanje pranja novca i finansiranje terorističkih aktivnosti veoma je važan za izvršavanje redovnih zadataka SIPA-e.

SIPA je insistirala na brznoj reakciji Ministarstva sigurnosti BiH u pripremi Strategije za borbu protiv terorizma, posebno vođena problemima koji su bili evidentni u koordinaciji rada policijskih agencija tokom terorističkog napada na Ambasadu SAD-a.

Prioriteti rada SIPA-e su prevencija i borba protiv sve izraženijeg finansijskog kriminala, pranja novca i poreskih utaja. Operativna grupa za borbu protiv terorizma ne radi onako kako je dogovoreno, jer njeni članovi sve manje prisustvuju radnim sastancima tog veoma značajnog tijela.

SIPA svoje aktivnosti usmjerava na izgradnju nove baze specijalne jedinice. Posebne ambicije SIPA pokazuje za formiranje helikopterske jedinice koja bi bila posebno značajna za brzo i efikasno djelovanje.

2.3. SLUŽBA ZA POSLOVE SA STRANCIMA BiH

Konstatirano je da stanje u Službi za poslove sa strancima nije nepoznanica članovima Zajedničke komisije. Tokom posjete koju je Zajednička komisija realizirala u decembru 2011. godine, vidljivo je da Služba ima određene probleme u oblasti nezakonitih migracija s posebnim osvrtom na ilegalne migrante iz afro-azijskog područja, probleme utvrđivanja identiteta ilegalnih emigranata iz afro-azijskog područja, pri čemu je povrat tih lica izuzetno kompliciran, često dugotrajan i skup postupak.

Članovi Zajedničke komisije znaju da je u toku priprema izmjena i dopuna Zakona o kretanju i boravku stanaca i azilu s ciljem stvaranja efikasnijih mehanizama za upravljanje migracijama i uspješne borbe protiv ilegalnih migracija. Tu izmjenu pratila bi i odgovarajuća reorganizacija Službe putem izmjena i dopuna Zakona o Službi za poslove sa strancima, koji treba prethodno biti dobro osmišljen i usaglašen.

I dalje je predmet interesa tok revizije državljanstava naturaliziranih državljana u smislu mjera koje je Služba preduzela na identifikaciji i pronalaženju lica kojima je u postupku revizije oduzeto državljanstvo BiH, kao i statusu lica kojima je oduzeto bh. državljanstvo, a još se nalaze na teritoriji BiH.

Služba kroz svoje jedinstveno postupanje na cijeloj teritoriji BiH daje određeni doprinos ukupnom sigurnosnom sistemu BiH što je na kraju i obaveza i jedan od prioritetnih ciljeva.

Komisija je u svojoj proceduri tokom revizije utvrdila da 561 lice nema stvarnu vezu s BiH. Poslije toga izvršene su odgovarajuće provjere na terenu i saradnjom s drugim sigurnosnim agencijama uspjeli su na teritoriji BiH pronaći 20 lica koja su bila predmet rada Službe u posljednjih 4 - 5 godina. Od tih 20 lica Služba je uspjela njih 12 deportirati iz BiH.

Za 32 lica Obavještajno-sigurnosna agencija BiH utvrdila je da bi mogli predstavljati potencijalnu prijetnju sigurnosti BiH iz segmenta terorizma. Data je obaveza Graničnoj policiji BiH da se zabrani ulazak tim licima u BiH.

2.4. DIREKCIJA ZA KOORDINACIJU POLICIJSKIH TIJELA BiH

Njeno uspostavljanje bio je jedan od uslova za viznu liberalizaciju. Smještena je na tri lokacije. Sjedište u objektu bivšeg Studentskog doma u Nedžarićima koji je po kapacitetima jedan od najuslovnijih objekata za tu namjenu u Sarajevu. Sektor za osiguranje VIP osoba i objekata smješten je u krugu Policijske akademije Federalnog ministarstva unutrašnjih poslova na Vracama, u totalno neuslovnom objektu predviđenom za rušenje.

Kada je u pitanju formalno - pravni okvir, vidljivi su brojni problemi. Vijeće ministara BiH nije usvojilo Pravilnik o policijskoj legitimaciji i policijskoj znački. Poslovi osiguranja VIP osoba i objekata još uvijek se obavljaju s policijskim značkama SIPA-e. Zakon o policijskim službenicima ne prepoznaje brojne probleme Direkcije (problem plaća).

Zakupnina za smještaj organizacionih dijelova Direkcije se plaća i ako se u dogledno vrijeme ne donesu adekvatne odluke bit će bespredmetno razgovarati o njihovom daljnjem angažmanu. (Terenski uredi u Sektoru za osiguranje VIP osoba u Banjoj Luci, Mostaru i Tuzli nemaju osiguran smještaj).

Direkcija osigurava oko 110 objekata u Sarajevu. U pitanju su ambasade, konzulati, rezidencije. S obzirom da ambasade BiH u svijetu osigurava svega 10 zemalja, neophodno je izvršiti racionalizaciju osiguranja DKP-a u BiH.

Pitanje materijalno - tehničke opremljenosti je ispod svakog nivoa. Informatička i komunikacijska oprema je prevaziđena i zastarjela pogotovo kad je u pitanju Sektor za međunarodnu policijsku saradnju - Interpol.

2.5. AGENCIJA ZA POLICIJSKU PODRŠKU

Agencija za policijsku podršku još uvijek traži svoj razlog postojanja i ne vide se dovoljno konkretni i prepoznatljivi efekti koje je u prethodnom periodu uradila i ostvarila. Postoji niz pitanja na koja treba odgovoriti.

Agencija je u potpunosti uradila Projekat Centralne evidencije zaposlenih u policijskim tijelima BiH.

Izrada Pravilnika o standardiziranoj opremi i naoružanju policijskih tijela BiH, kojim će se prvi put propisati i ujednačiti sve vrste opreme i naoružanja koje se koriste u policijskim tijelima, u završnoj je fazi. Polovinom 2012. godine okončan je rad na izmjenama i dopunama Zakona o policijskim službenicima, koji Ministarstvu sigurnosti BiH treba i formalno uputiti u parlamentarnu proceduru.

Agencija radi i na izradi Projekta informacionog sistema za evidenciju standardizirane policijske opreme i vozila. Formirana je radna grupa za izradu, harmonizaciju i praćenje primjene propisa koji reguliraju rad policijskih tijela BiH. Problem i dalje predstavlja zakonom utvrđena nadležnost za provođenje tenderske procedure za određenu opremu za policijska tijela BiH.

2.6. AGENCIJA ZA FORENZIČKA ISPITIVANJA I VJEŠTAČENJA

Agencija je smještena u reprezentativnom prostoru, površine oko 1000 m, u objektu SIPA-e. Od četiri laboratorije, koje su u nadležnosti ove agencije, uspostavljene su tri, i to: laboratorija za forenziku, laboratorija za vještačenje kompjuterskih sistema i laboratorija za grafološka vještačenja.

Laboratorija za DNK nije uspostavljena, jer je laboratorija koju je BiH poklonila Evropska komisija privremeno smještena u Federalnu upravu policije i poslije toga nikad nije vraćena.

Agencija još uvijek nije sasvim funkcionalna zbog toga što nije uspostavljena ključna laboratorija.

2.7. AGENCIJA ZA ŠKOLOVANJE I STRUČNO USAVRŠAVANJE

Agencija je od nastanka do danas odškolovala svega 18 kadeta, onoliko koliko su uputile policijske agencije.

Potrebno je uraditi analizu koja će objektivno pokazati da li u okolnostima recesije i smanjenja budžeta institucija BiH treba ulagati u infrastrukturu koja se ne koristi dovoljno.

3. MINISTARSTVO VANJSKE TRGOVINE I EKONOMSKIH ODNOSA BiH

Ministarstvo vanjske trgovine i ekonomskih odnosa BiH, u dijelu svoje nadležnosti, ima izdavanje dozvola za izvoz i uvoz naoružanja i poznato je da je Zajednička komisija imala probleme s Ministarstvom jer nije rađen adekvatan izvještaj na osnovu kojeg bi se mogle uraditi adekvatne analize i donositi zaključci. Tek u Izvještaju za 2011. godinu Zajednička komisija je prvi put dobila podatke iz kojih se jasno vidi o izvozu koje vrste oružja se radi.

Ostala je još jedna obaveza Ministarstva - da u skladu s nekadašnjim principom izvještava Zajedničku komisiju dva puta godišnje o izdatim, odnosno realiziranim dozvolama. Ministarstvo još uvijek nije dostavilo prijedlog zakona kojim će se to definirati.

Kada je u pitanju sistem „TRACKER“, koji je donirala Vlada SAD-a 2007., potrebno je osigurati server većih mogućnosti i u potpunosti pustiti sistem u funkciju.

4. PROCES DEMINIRANJA

Usvajanjem novog Zakona o protuminskom djelovanju u BiH, Ministarstvo civilnih poslova BiH preuzima najveći dio obaveza i odgovornosti, a Centar za deminiranje - BHMACH postaje upravna organizacija koja će realizirati poslove iz svoje nadležnosti.

Potpuno je jasno da je tokom 2011. i 2012. godine došlo do zastoja u procesu deminiranja. Postavlja se pitanje trošenja iznosa od 7,5 miliona eura koje je uložila Evropska komisija, te 3 miliona američkih dolara koje su do sada godišnje ulagale SAD u deminiranje.

Izražena je spremnost SR Njemačke, Kanade i Češke Republike za ulaganje u proces deminiranja pod uslovom da se formira vlastiti fond za deminiranje u BiH (umjesto Povjereničkog IT fonda sa sjedištem u Sloveniji).

II. ZAKLJUČCI:

S ciljem otklanjanja slabosti u radu ministarstava, institucija i agencija iz sektora odbrane i sigurnosti, Zajednička komisija je na 19. sjednici, održanoj 23.1. 2013., usvojila sljedeće

ZAKLJUČKE

- 1. Obavezuje se MINISTARSTVO ODBRANE BiH da u roku od 60 dana od usvajanja ovog materijala Zajedničkoj komisiji dostavi akcioni plan za 2013. godinu s definiranim aktivnostima, nosiocima i rokovima prema sljedećem:**

- 1.1.status i stanje materijalno – finansijskog računovodstva u OSBiH,*
- 1.2.popis MiMES-a u skladištima,*
- 1.3.ponovna analiza perspektivne vojne imovine i rješavanje viškova MiMES-a,*
- 1.4.unapređenje procedura javnih nabavki,*
- 1.5.stanje personala u MOBiH i OSBiH,*
- 1.6.stanje ljudskih prava u OSBiH,*
- 1.7.remont helikoptera MI-8 i MI-17,*
- 1.8.nabavka uniformi za potrebe OSBiH,*
- 1.9.status dokumenta „Pregled odbrane“,*
- 1.10. dinamika predaja viška lokacija civilnim vlastima.*

- 2. Od MINISTARSTVA SIGURNOSTI BiH zahtijeva se da u roku od 60 dana dostavi sljedeće informacije o:**

- 2.1. ključnim sigurnosnim izazovima u BiH i načinu suprotstavljanja tim izazovima,**
- 2.2.mjerama koje se preduzimaju na očuvanju bezviznog režima,**

- 2.3.stanju sigurnosti u Bosni i Hercegovini za 2012. godinu,**
- 2.4.realizaciji Strategije i Akcionog plana za borbu protiv terorizma,**
- 2.5.realizaciji Strategije i Akcionog plana za bobru protiv organiziranog kriminala,**
- 2.6.ocjeni koordinacije rada policijskih agencija iz sastava Ministarstva sigurnosti BiH,**
- 2.7.planu okončanja rada na dokumentu „Sigurnosna politika BiH“**
- 2.8.stanju sigurnosti u Gornjoj Maoči,**
- 2.9.planu pomoći civilnom stanovništvu u slučajevima elementarnih nepogoda (prijetnje i rizici).**

Nakon dostavljenih informacija, Zajednička komisija organizirat će posjetu Ministarstvu sigurnosti BiH, gdje će u komunikaciji s direktorima policijskih agencija i najodgovornijim licima iz sastava Ministarstva sigurnosti BiH analizirati ispunjenje naznačenih obaveza.

- 3. U funkciji poboljšanja unutrašnje organizacije i efikasnosti postupanja DRŽAVNE AGENCIJE ZA ISTRAGE I ZAŠTITU - SIPA, obavezuje se direktor i menadžment SIPA-e da se i dalje angažiraju u borbi protiv terorizma, organiziranog kriminala, korupcije, te u rješavanju teških slučajeva finansijskog kriminala, pranja novca, itd.**

SIPA se obavezuje da provede Strategiju za borbu protiv terorizma, posebno zbog problema koji su bili evidentni u koordinaciji rada policijskih agencija tokom terorističkog napada na Ambasadu SAD-a.

- 4. U skladu sa Strategijom GRANIČNE POLICIJE BiH (2010.-2014.) u kojoj je utvrđeno pet ključnih ciljeva/prioriteta koji će omogućiti GPBiH da ispuni svoju misiju i viziju, potrebno je dostići definirane ciljeve, o čemu će direktor GPBiH informirati Zajedničku komisiju, koja će se kroz terenske posjete regionalnim uredima i druge forme rada s GPBiH uvjeriti u realizaciju postavljenih ciljeva.**

- 5. Direktor DIREKCIJE ZA KOORDINACIJU POLICIJSKIH TIJELA BiH obavezuje se da dostavi informaciju o statusu i provođenju postavljenih prioriternih ciljeva Direkcije, i to:**

- a) osiguranje trajnog smještaja Direkcije,
- b) jačanje kapaciteta (osoblje, oprema, itd.),
- c) instaliranje centralnog servera za elektronsku razmjenu podataka između policijskih tijela i tužilaštava,
- d) potpisivanje Memoranduma o saradnji, pružanju međusobne pomoći i koordinaciji poslova iz oblasti obavještanja i zaštite VIP osoba i objekata,

- e) **provođenje twining projekta,**
- f) **statusu i efikasnosti održavanja redovnih sastanaka Koordinacije direktora policijskih agencija za provođenje zakona u BiH i glavnog tužioca Tužilaštva BiH,**
- g) **rješavanju zakonskih i podzakonskih akata, koja će Direkciji omogućiti efikasan rad.**

Zajednička komisija je, u skladu s Orijentacionim planom rada za 2012. godinu, posjetila Direkciju i stekla je uvid u realizaciju postavljenih ciljeva te definirala, zajedno s menadžmentom, dalje moguće aktivnosti i pomoć u rješavanju trenutnih problema.

- 6. **AGENCIJA ZA FORENZIČKA ISPITIVANJA I VJEŠTAČENJA BiH**
- 7. **AGENCIJA ZA POLICIJSKU PODRŠKU BiH I**
- 8. **AGENCIJA ZA ŠKOLOVANJE I STRUČNO USAVRŠAVANJE KADROVA BiH**

Zajednička komisija će, u skladu s Orijentacionim planom rada za 2013., posjetiti navedene agencije i detaljnije se upoznati sa stanjem u njima, te domovima PSBiH predložiti raspravu tokom koje bi se analizirala njihova efikasnost u radu, s ciljem daljnje racionalizacije korištenja budžetskih sredstava.

- 9. **MINISTARSTVO VANJSKE TRGOVINE I EKONOMSKIH ODNOSA BiH (MVTEOBiH)** obavezuje se da Zajedničkoj komisiji dostavi potrebne podatke o radu „TRACKER“ sistema i njegovom korištenju u svrhu za koju je namijenjen. Potrebno je u roku od 30 dana da dostavi prijedlog zakonskih rješenja koja će procedure i rad MVTEOBiH učiniti efikasnim, transparentnim i u zakonskim okvirima kredibilnim, posebno u oblasti inspekcijskog nadzora.

- 10. **Rad CENTRA ZA UKLANJANJE MINA – BHMAC-a,** u okviru Ministarstva civilnih poslova BiH, pratit će se s ciljem provođenja Zakona o protuminskom djelovanju u BiH koji je trenutno u parlamentarnoj proceduri. U skladu s predloženim zakonskim rješenjima, od Ministarstva civilnih poslova BiH očekuje se da primijeni Zakon u mjeri koja će omogućiti nastavak protuminskih akcija u BiH, rješenja finansiranja i praćenja realizacije Strategije za deminiranje do 2020. godine.

PREDSJEDAVAJUĆA KOMISIJE
Dužanka Majkić

Dostavljeno:

- naslovu,
- a/a.